

Na osnovu člana 118. Zakona o visokom obrazovanju-Prečišćeni tekst („Službene novine Kantona Sarajevo“ broj: 42/13, 13/15) i člana 53. stav (1) tačka b) Statuta Univerziteta u Sarajevu, Upravni odbor Univerziteta u Sarajevu, na 32. redovnoj sjednici održanoj 27. 12. 2016. godine, d o n i o j e

**PRAVILNIK
O NAČINU OBRAZOVANJA I UTVRĐIVANJU VISINE NAKNADE ZA RAD RADNIH
TIJELA KOJA SE OSNIVAJU NA UNIVERZITETU U SARAJEVU**

**Član 1.
(Predmet Pravilnika i definicije pojmova)**

(1) Ovim Pravilnikom utvrđuje se način, uslovi i kriteriji za obrazovanje radnih tijela, komisija, savjeta, koordinacija, odbora, timova, jedinica i drugih radnih tijela (u daljem tekstu: Komisija) i visina novčane naknade za članove, stručna i tehnička lica Komisija koje se osnivaju na Univerzitetu u Sarajevu (u daljem tekstu: Univerzitet).

(2) Pod Komisijom iz stava 1. ovog člana podrazumijeva se:

a) Komisija koju obrazuje Senat Univerziteta (u daljnjem tekstu: Senat) na osnovu posebnih propisa, čiji članovi mogu biti članovi Senata i radnici Univerziteta;

b) Komisija koju obrazuje Upravni odbor Univerziteta (u daljnjem tekstu: Upravni odbor) na osnovu posebnih propisa, čiji članovi mogu biti članovi Upravnog odbora i radnici Univerziteta;

c) Komisija koju obrazuje Upravni odbor, na osnovu posebnih propisa, na prijedlog rektora Univerziteta (u daljnjem tekstu: Rektor);

d) Komisija koju samostalno obrazuje Rektor, na osnovu posebnih propisa, čiji članovi mogu biti radnici Univerziteta;

(3) Članovi Komisije iz stava 2. ovog člana mogu biti i stručnjaci koji nisu u radnom odnosu na Univerzitetu, a predlažu se zbog svoje stručnosti kao vanjski saradnici.

(4) Članovi Komisije iz stava 2. ovog člana, mogu biti angažovani najviše u dvije Komisije istovremeno.

**Član 2.
(Obrazovanje Komisije)**

(1) Komisija se može obrazovati radi:

a) predlaganja kadrovskih imenovanja, odnosno postavljenja po osnovu zakonske obaveze javnog oglašavanja;

b) provođenja redovnog godišnjeg popisa stalnih sredstava;

c) provođenja postupaka javnih nabavki;

d) drugim slučajevima propisanim zakonom.

(2) Komisija se može obrazovati samo za poslove i radne zadatke koji nisu u djelokrugu rada nijednog zaposlenika Univerziteta, kao i za poslove i radne zadatke za koje je posebnim zakonskim i podzakonskim aktima utvrđeno da ih obavlja Komisija.

(3) Izuzetno, Komisija se može obrazovati i za poslove i radne zadatke koji su u djelokrugu rada radnika Univerziteta, kada se radi o izuzetno složenom zadatku koji ne mogu obaviti samo radnici Univerziteta, bez saradnje sa drugim organima ili stručnjacima iz odgovarajuće oblasti. U navedenom slučaju Komisija može raditi u radnom vremenu i nema pravo na naknadu za svoj rad, izuzev članova Komisije koji nisu radnici Univerziteta u Sarajevu.

Član 3. (Način obrazovanja Komisije)

(1) Aktom o obrazovanju Komisije mogu se odrediti tehnička lica koja će obavljati administrativno-tehničke poslove za potrebe Komisije.

(2) Akt o obrazovanju Komisije obavezno sadrži sljedeće podatke: ime i prezime predsjednika i članova Komisije, ime i prezime tehničkog lica za obavljanje administrativno-tehničkih poslova za potrebe Komisije, poslove i zadatke Komisije, rok za izvršavanje poslova i zadataka i pravo na naknadu članova i stručnih i tehničkih lica Komisije.

(3) Smatra se da su poslovi i zadaci Komisije izvršeni nakon prihvatanja izvještaja od strane tijela koje je obrazovalo Komisiju, nakon čega tijelo koje je obrazovalo Komisiju donosi rješenje o utvrđivanju visine i isplati naknade za rad u Komisiji.

Član 4. (Kriteriji za utvrđivanje visine naknade)

(1) Za utvrđivanje visine naknade za rad članova Komisije uzimaju se sljedeći kriterijumi:

- a) složenost oblasti za koju se obrazuje Komisija;
- b) potrebna stručnost;
- c) obuhvat različitih oblasti;
- d) obim poslova i zadataka;
- e) precizno određeni rokovi za izvršenje poslova i zadataka;
- f) potreba praktičnog rada na terenu;
- g) broj održanih sjednica za stalne Komisije, uz uslov da se održi najmanje jedna sjednica mjesečno.

(2) Članovi Komisije ostvaruju pravo na naknadu samo pod uslovom da su poslove i radne zadatke za koje su zaduženi aktom o osnivanju Komisije obavljali poslije redovnog radnog vremena, sa izuzetkom Komisije iz člana 2. stav (3) ovog Pravilnika, koja može raditi i u radno vrijeme.

Član 5. (Visina naknade)

(1) Članovi Komisije koja se formira na osnovu odluke Senata, Upravnog odbora, odnosno Rektora, imaju pravo na maksimalnu mjesečnu naknadu za rad u komisijama u iznosu do 300,00 KM, pod uslovom da je Komisija radila izvan radnog vremena.

(2) Tehničkom licu iz člana 3. stav (2) ove Odluke pripada mjesečna naknada najviše do 70% iznosa naknade utvrđene za jednog člana Komisije.

(3) Naknada se isplaćuje po izvršenom zadatku i isključuje pravo na prekovremeni rad.

(4) Konkretni mjesečni iznos naknade članovima Komisije i tehničkom licu utvrđuje tijelo koje je obrazovalo Komisiju, donošenjem rješenja o utvrđivanju visine i isplati naknade za rad u Komisiji, nakon što prihvati izvještaj Komisije o izvršenim poslovima i zadacima, a sve u skladu sa maksimalnim iznosima utvrđenim u stavu (1) i (2) ovog člana.

(5) Izuzetno, na osnovu kriterija iz člana 4. ovog Pravilnika, za učešće u radu pojedinih komisija za izvršenje izuzetno složenih zadataka, za koje se zahtijeva posebna stručnost članova Komisije iz odgovarajuće oblasti, može se utvrditi i veća visina mjesečne naknade od visine utvrđene u stavu (1) i (2) ovog člana. Odluku o visini mjesečne naknade utvrđuje tijelo koje je obrazovalo Komisiju.

(6) Ovaj Pravilnik se ne primjenjuje na ad hoc Komisije koje se imenuju za izvršenje određenih zadataka (napr. komisije za akademska priznavanja inostranih visokoškolskih kvalifikacija i druge), a koje se finansiraju iz sredstava koje uplaćuju korisnici usluga.

Član 6. (Izvještavanje)

Šef Službe za računovodstvo i finansije Univerziteta dužan je Upravnom odboru dostavljati tromjesečne izvještaje o visini isplaćenih naknada za članove Komisija na koje se odnosi ovaj Pravilnik.

Član 7. (Završne odredbe)

Ovaj Pravilnik stupa na snagu danom donošenja.

